

Ina purschida tranter chasa e chasa da tgira

Il cussegl grond è sa fatschentà cun la revisiun da la lescha per promover la tgira da malsauns

■ (anr/ac) Cumbinar aspects socials cun politica da finanzas. Il cusseglier guvernativ Christian Rathgeb ha titulà la revisiun da la lescha da la tgira da malsauns sco act da pionier. Il cussegl grond ha tractà la revisiun il mardi passà.

Pussibilitar a persunas attempadas cun modestas entradas da far diever da la pussaivladad dad abitar cun assistenza. Quella finamira ha la revisiun da la lescha chantuala per promover la tgira da malsauns. Pledà a favur da la revisiun da la lescha han principalmain aspects finanzials e socials. Tant il chantun sco las vischnancas profitesch numnadamain per saldo da las midadas e da la nova purschida. Persunas attempadas cun pitschnas entradas che na pon betg pli abitar a chasa e che n'èn betg avisadas dad entrar en ina chasa da vegls e da tgira pon nizzegiar in'abitaziun che porscha in modest sustegn en il mintgadi. A talas persunas po il chantun conceder contribuziuns supplementaras da l'assicuranza da vegls. Damai che l'abitar assistì è pli favuraivel che las taxas da las instituziuns da vegls e da tgira quinta il chantun da pudair spargnar. En la fasa da consultaziun era vegnì fatg attent che las vischnancas na dastgian betg vegnir adossadas cun dapli custs entras la revisiun da la lescha. Tenor il messadi da la regenza dastgan las vischnancas medemamain quintar cun in levgiament finanziel da bunamain 700 000 francs per onn. Ils respargns per las vischnancas na derivan betg da pli pingas contribuziuns, dentant spargna il maun public perquai ch'el po desister



Cun la revisiun da la lescha per promover la tgira da malsauns san era persunas attempadas cun modestas entradas far diever da l'abitar cun assistenza.

FOTO O. ITEM

dad ulteriurs plazs da tgira en las instituziuns da tgira e consequentamain spargnar contribuziuns ad investiziuns vers quels plazs.

Las abitaziuns porscha l'economia privata

La revisiun da la lescha da tgira resta modesta e la lescha surlascha a l'econo-

mia privata da stgaffir las abitaziuns adattadas per abitar cun assistenza. Il dumber dad abitaziuns è dentant defini da la lescha sin almain sis per edifi-

ed era pertutgant il nivel da construcziun existan prescripziuns minimalas che duajan segirar la mobilitad da persunas attempadas che basegnan sustegn. Entaifer la fasa da consultaziun è la revisiun anc vegnida crititgada vehement. Principalmain pervia da la proposta da stritgar en vista a la nova purschida las contribuziuns d'investiziun a novs plazs da tgira a favur da las chasas da vegls. Diversas regiuns han fatg valair ch'il basegn per novs plazs da tgira saja vinavant dà malgrà la nova purschida. Desistì ha la regenza en sia proposta era da definir las taxas dal di per l'abitar cun assistenza.

Taxas tenor agens basegns

La lescha revedida enconuscha naginas taxas uschia ch'ìls purschiders da las abitaziuns pon definir tenor agen basegn las taxas. Ils purschiders basegnan dentant il cunsentiment dal l'Uffizi chantunal da sanadad per dastgar porscher abitaziuns adattadas per abitar cun assistenza. La cumissiun predeliberanta ha acceptà senza grondas resalvas la revisiun da la lescha. Ella ha sulet proponì da pussibilitar in dumber dad abitaziuns pli pitschen sche las abitaziuns cun assistenza èn agiuntadas ad ina instituziun da tgira existenta. La via da la revisiun è stada lunga. Quei mussan las correcturas che la cumissiun ha fatg vers la proposta dal chantun. Ella ha stuì stritgar in grond dumber da vischnancas ord las regiuns da tgira. Simplamain perquai che las vischnancas n'existan betg pli en consequenza da diversas fusiuns.